



La regenza en corpore en sia nova cumposiziun: Marcus Caduff, Christian Rathgeb, Jon Domenic Parolini, Mario Cavigelli e Peter Peyer (da san.).

FOTO O. ITEM

## Sustegn per la midada dal dretg fiscal

■ (anr/fa) Il cussegl grond ha tractà la revisiun parziala da la lescha chantunala da taglia sco era la lescha davart las taglias communalas e las taglias da baselgia. Ins ha discussiunà era novas furmas da viver. Sco emprim afar ha il cussegl grond cumenzà glindesdi a tractar la revisiun parziala da la lescha da taglia per il chantun Grischun e da la lescha davart las taglias communalas e davart las taglias da baselgia (taglia sin ierta e sin donaziuns). «La taglia sin ierta chantunala duai daventar nov ina taglia sin la quota d'ierta», ha declarà *Retto Loepfe* (pcd, Razén), il president da la cumissiun predeliberanta, «cun questa revisiun parziala prevesa la regenza dad armonisar ils reglaments en il chantun ed en las vischnancas.» Quellas pon vivanant decider sezzas sch'ellas vulan preterder sper la taglia chantunala sin l'ierta er anc ina taglia communalala sin la quota d'ierta.

### Consequenzas finanzialas da la revisiun

«La revisiun proponida na prevesa betg mo da liberar da l'obligaziun da pajar taglia sin ierta sco enfin uss ils conjugals, uffants e partenaris en concubinac, ma bain nov er ils geniturs», ha ditg Loepfe. Las personas cun dretg d'ierta dal tschep dals geniturs duain stuir en avegnir pa-

jar per lur part da l'ierta mo pli tschintg e na diesch pertschient. Ils ulteriurs er-tavels dentant duain pajar 15 enstagl da diesch pertschient sco enfin uss. Las consequenzas finanzialas da quests midaments dependan da quant auts ch'igl èn ils imports suttaless a la taglia en questas duas gruppas. Tenor las calculaziuns da l'Administraziun da taglia chantunala per ils onns 2015 fin 2017 vegnan a resultar or da la liberaziun da taglia dals geniturs e dal midament proponì per las personas cun dretg d'ierta or dal tschep dals geniturs perditas da var 4,2 milliuns francs.

### Reducziun da taglias ina cuntradiziun?

En la debatta d'entrada ha *Lukas Horrer* (ps, Cuira) ditg ch'il chantun sa pudess baingea prestar da sbassar questas taglias sin ierta. «Nus na stuessan dentant tuttina betg far quai», ha el accentuà e menziunà il program GR Flex da la regenza: «La regenza prevesa cun quel program da spargnar ils proxims onns. Ed ussa vulain nus sbassar la taglia sin ierta.» Quai ha el numnà «ina cuntradiziun politic-economica». El e collegas da la fracziun han proponì da midar il sistem, però senza sbassar la taglia sin ierta. *Michael Pfäffli* (pld, Engiadin'Ota) ha manegia che tuts profitian da sbassaments da la taglia «e

betg mo in pèr paucs benestants». Il parlament ha decis senza cuntravusch da tractar la missiva en detagl.

### Deliberaziun era per descendents na cuminaivels

La gronda part da la discussiun detagliada ha il cussegl grond evas da maniera speditiva. La cumissiun predeliberanta era stada da different avis mo en dus puncts. Pensond a las novas furmas da viver ensemen, chavazzin «patchwork-familiy», aveva la maioritad da la cumissiun, senza la regenza, fatg la dumonda da deliberar da la taglia sin ierta er ils descendents che conjugals u partenaris en concubinac han «manà» en famiglia. Il parlament ha approvà quest midament cun 72:44 vuschs. Ina minoritad da la cumissiun, commembers da la pld, aveva fatg la dumonda da deliberar er il tschep dals geniturs, frars e soras e lur descendenza, da la taglia sin ierta. Cusseglger guvernativ *Christian Rathgeb* ha avertì che quai avess per consequenza «perditas annualas d'almain 10 milliuns e betg mo 4,2 milliuns francs». Questa proposta ha refusà il cussegl grond cun 72:45 vuschs. Cunquei ch'il parlament aveva a las tschintg la saira in termin cuminaivel finescha el la discussiun detagliada e decida davart la revisiun parziala pir durant il segund di da la sessiun.